



Minggu, 29 Mei 2022
Kuan-kuanen 4:23-24



"Perukuren Mabai Dalam Kegeluhen"



It sada ilustrasi i bas buku renungen si judulna 'jagalah hatimu.' Bagenda ilustrasina. Sepasang perbulangen ndehara mbaru erjabu, tading bas kompleks perumahan. Rumahna ras rumah tetanggana rembak si kawes ras kemuhen. Jemureнна pe siidahen. Si ndehara e mperdiateken tetanggana teptep kali njemur arah jendela kamar tidurna nari. E maka ikomentarina uis tetangga si bas jemuren ndai nina, la bersih uis bibi si sebelah ta e, nen min ah, idah denga bintik-bintik bas bajuna. Katakenna e man perbulangenna. Dua wari nari pe tupung njemur tetanggana e pandangina ka, sebah idahna denga melket uis si ijemurna. Nina man perbulangenna, 'la lah megatel akap perbulangenna make uisna pe,' la kuakap ieteh bibi ah nuci me, entah kurang rusur sabunna. La aloi perbulangenna si ibelasken ndeharana e. Minggu si rehna njemur ka tetanggana e, tapi idahna enggo bersih ras cerah. E maka nina man perbulangenna, sendah enggo bersih penuci bibi ah uisna, idahndu ah enggo cerah kerina. Nina perbulangenna, nderbih enggo ku cuci kaca jendela kamarta e alu rinso, e maka ku elap alu uis si kerah. Labo bibi ah si la bersih nuci, tapi kaca rumahta nge si melket.

Bage kepe bas kegeluhennta enda, adi perukuren la bersih, penilaianta man kalak si deban pe megati la bersih. E maka ipersingeti kita arah renungenta, *manjar-anjar kam rukur, sabap perukurenndu kap si mabai dalam kegeluhenndu*. Ertina perukuren e me pusat kegeluhenta. Kai pe ateta si belasken entah lakoken, benana e enggo lit bas ukurta nari. Perukuren si bersih rehna arah pusuh si bersih nari. Adi perukuren bersih kata-kata siibelasken kita pe bersih. Adi kata-katata pe bersih, teridah me e arah perbahanen. Termasuk i bas nepati janji, perlu kal lit komitmen i bas pusuh. Pusuh si bersih, ukurina lebe maka belaskenna. Janah kai si ibelakenna e itepatina.